

Monedanan Europeo a perde nan balor levemente

FLORIN ARUBANO Y ANTIYANO A BIRA MAS SOLIDO



Dir. Carlo Mansur

ORANJESTAD (EPI-MAH) Siman pasa rumornan a core na Corsow encunto peligro di devaluacion di moneda Antiyano, y durante fin di siman cu ta e moneda Arubano a worde menciona den e sentido aki.

EXTRA a busca mas informacion na respecto, pa cual a drenta den contacto cu Sr. Carlo Mansur di Interbank, kende a duna nos un amplio splicacion di e motibo cu por a causa cierto confusion den esaki.

Sr. Mansur a señala cu e monedanan Arubano y Antiyano ta mara na dollar (1.78) y nos por considera cu ambos moneda ta fuerte si nos mira e balansa di pago y e reservanan.

No tin diferencia entre e dos moneda aki relaciona cu dollar.

Tambe el a splica cu e Banconan Central di Aruba y di Antiyas ta

mantene cuenta na Banco Central di, entre otro, Hulanda.

Door di esaki e Banconan Central por cumpra y vende moneda stranhero (foreign exchange) pa estabiliza cualquier fluctuacion fuera di lo normal, pues tanten cu tin reserva y moneda stranhero no por papia di devaluacion.

Nos reservanan ta cubri semper tres luna di importacion lo cual ta sano segun norma di I.M.F (Fondo Monetario Internacional), anto no tin motibo pa ningun panico relaciona cu devaluacion di Florin Arubano ni Antiyano.

Un di e motibonan cu e monedanan stranhero (incluyendo Florin Hulandes) ta perdiendo balor ta pasobra actualmente tin gran demanda di dollar door cu Kuwait lo bai reconstrui

su pais y e manehadornan di moneda stranhero ta bendiendo hopi di nan pa cumpra US\$ dollar.

Mas demanda di dollar ta hasi esaki bira mas caro. Florin Hulandes, por lo tanto, tambe ta perdiendo balor lo cual no ta nada fuera di lo normal, sino unicamente ta trata di un ahuste di oferta y demanda.

Door cu monedanan Arubano y Antiyano ta mara na Dollar, y e moneda aki a subi den

balor, e debenan cu tanto Aruba como Antiyas tin cu Hulanda lo costa nan gobierno respectivo menos, segun Sr. Carlos Mansur a splica.

Di banda di e leve depreciacion di e monedanan europeo tin un constante devaluacion di algun moneda latinoamericano, y por ta cu e fenomeno aki tambe tabatin algun efecto riba speculation cu a surgi riba devaluacion di Florin Antiyano.

Ta asina cu for di siman pasa EXTRA a drenta den contacto Sr. Arthur Irausquin, Director di Banco Central di Aruba, kende a bisa cu e rumoranan aki no tabatin ningun base, y cu tin un temporada unda e comentarionan ta haya forza na Antiyas.

For di e comentario cu nos a haya door di Sr. Mansur, toch nos por saca como conclusion cu mas bien e monedanan Arubano y Antiyano a bira mas solido.

Extra . - (dialuna 25 maart 1991)